

直隸省形勢說略

直隸省古爲燕地因北京中央政府直轄全國各省取以爲名該省地勢雄據黃河以北偏居十八省之東北西北半部高而多山東南半部低爲平原東境貼近渤海東南接山東海岸東北連奉天海岸南境伸入河南山東境中西亘太行恆山之脈而界於山西北跨長城陰山之脈而界於內蒙古

直隸省舊領十二府

今廢

順天府名曰北京係前代建都之地舊設府尹獨立於直

隸布政使之外

今改京兆尹

北京居天下上游北以萬里長城爲特險南以幾輔八郡爲

保障龍蟠虎踞形勝稱最順天府之西南曰保定府是爲直隸省城保定府之東南曰河間府河間府之東北曰天津府天津府之東北曰永平府是爲京畿以東四府保定府之西南曰正定府正定府之南曰順德府順德府之南曰廣平府廣平府之東南曰大名府是爲京畿西南四府此長城以內諸郡也順天府之東北永平府之北曰承德府承德府之東北曰朝陽府承德府之西保定府之西北曰宣化府此長城以外諸郡也

直隸西境以太行山最爲著名列子名大形山又名五行山山脈從河南懷慶府北起繞入山西澤州府鳳臺縣迤南又東經正定府獲鹿井陘等縣復東北跨易州昌平境直走燕京之北東抵永平府海岸之碣石山全脈共有百嶺延袤二千餘里實爲直省西北之大防畧述該山險要如左

甲井陘山在井陘縣東北正定府西南一百四十里山上有關曰井陘關亦名土門一關距山西平定州九十里此係太行山第五陘該處道狹徑仄車騎單行北接恆山東界獲鹿扼守此處西入太原北援燕京有如高屋建瓴之勢

乙山海關查碣石山在永平府東南二十里去海岸數十里係昌黎縣境山高千仞路僅通車今此山已沒碣石山之北曰山海關古名渝關關倚臨渝縣城在撫寧縣東

一百里距北京六百七十里山峻海闊稱爲天險扼守此處東控遼瀋西顧北京可遏北寇南下之路

丙飛狐口在宣化府蔚州以南廣昌以北該處兩崖對立中通一路迤邐繞絕百有餘里此係太行第六陘乃太行恆山交互之處爲居庸紫荆倒馬三關之外險扼

守此處東下涿州西出雁門南瞰廣平北趨宣化可制天下之命

按太行山以北又有長嶺名曰恆山高三千九百丈七尺上方三十里周廻一百三十里亦稱常山又名大茂天下名山五嶽最尊此爲北嶽與太行山脈俱東入海禹貢所云太行恆山至於碣石是也山脈從山西大同府渾源州南二十里起東入直隸西北境經過宣化府蔚州及易州廣昌縣橫穿太行山之巔成十字形出飛狐口倒馬關由廣昌南走而分峙於定州曲陽縣西北一百四十里及正定府阜平縣東北七十里直抵保定府唐縣望都一帶山麓盤結連綿不斷此直省西北之大勢也直隸東境濱臨大海沿海要隘曰大沽口曰北塘口曰山海關此外別無險要直隸南境狹伸入豫魯兩省之中廣平順德大名三府均爲直省西南邊郡與河南彰德府交界地勢平衍無險可守古稱四戰之地大名府以南係黃河流域經過之處上通河南下接山東一隅之水險尙可憑又如畿輔八郡之間如滹沱河控陽河及東淀西淀一帶畧可阻水設防舍此則祇有保守城寨之一法焉此直省東南之大勢也

統觀直省大勢雄踞河北俯瞰中原形勢最勝昔光武中興以河北爲根本遂併中原唐季河北一失大勢已去遼金據有河北南宋不支自元明清以迄民國建都北京皆因坐鎮直隸可以制中原也直省境外以山東爲屏蔽以山西河南爲藩籬以遼關爲戶檻又以遼瀋永平爲重鎮遼瀋當直省邊衝永年扼直省要險遼瀋之間又以榆關爲內外門戶遼瀋有事則榆關警榆關不守則永平危由此長驅南下黃河以北遼關以東野千里無險可扼故自古注意遼瀋永平之防設爲重鎮也